

欽
定
全
唐
文

欽定全唐文卷五十三目錄

德宗 四

贈趙憬太子太傅詔

給復奉先等八縣詔

答盧邁請辭官詔

修昆明池詔

聽朝官伏臘過從詔

許盧邁辭官詔

罷盧邁平章事詔

放免諸道積欠詔

修八陵宮寢詔

議修八陵宮寢詔

出官米平糶詔

罷趙宗儒平章事詔

答羣臣賀修八陵畢詔

貶韓臯撫州司馬詔

命兵禮部留放人就尚書侍郎對定詔

討吳少誠詔

軍健逋欠牒送本司詔

停正衙奏事詔

恤水災詔

聽納青苗錢詔

祔獻祖懿祖於興聖廟詔

遣宰臣告廟詔

亢旱令諸司錄囚詔

免京畿積欠詔

流崔河圖崖州詔

授孔述睿太子侍讀詔

答孔述睿辭官詔

起復張重政詔

封張重政母魯國太夫人詔

允權德輿請緣遷祔令子弟營護奏手詔

令郊廟從行官吏等自備食物詔

卹葬邢士倫母子詔

答王真進道德經論兵要義手詔

御望春樓誓師詔

遺詔

欽定全唐文卷五十三

德宗 四

贈趙憬太子太傅詔

翼宣王猷德禮終始蕭何賛清靜之化柳莊爲社稷之臣
永念忠勞厚其贈祿舉茲命數以寄哀懷故門下侍郎同
平章事趙憬體仁宏義循法守正有絜矩之操有致君之
誠素履彰其貞固黃中發於事業文含大雅望重周行暢
絕域之恩信整天臺之綱轄啟迪理本勤勞國均奉上見
宣孟之忠居室聞晏嬰之儉訐謏左掖盡瘁五年嘗納誨

以沃心每匪躬以經遠感疾未逾於信宿殲良俄即於杳冥震悼之深當宁流嘆禮有旌飾峻其寵章追崇保傳永慰窀穸可贈太子太傅所司備禮冊命賜布絹五百端匹米粟四百石令鴻臚卿王權充冊弔使

給復奉先等八縣詔

京兆府所奏奉先等八縣旱損秋苗一萬頃計三萬六千二百石青苗錢一萬八千二百貫比緣春夏少雨秋稼或傷頃畝雖損非多黎庶猶慮艱食況畿甸之內供應實煩須有優矜以寬疲瘵其所奏損特宜放免

答盧邁請辭官詔

卿職重台衡道存忠諒自嬰所疾每著於懷日冀有瘳宜善將攝遽茲陳請殊曰不然未遂乃誠當悉朕意

修昆明池詔

昆明池俯近都城古之舊制蒲魚所產實利於人宜令京兆尹韓臯充使即勾當修堰漲池

聽朝官伏臘過從詔

比來朝官或諸處過從金吾皆以上聞其閒如素是親故或會同僚友伏臘歲序時有還往亦是常禮人情所通自

今已後金吾不須聞

許盧邁辭官詔

卿操履貞方器識淹茂自居台輔益見忠清方藉謀猷遽
嬰疾疹歲月滋久章表屢聞陳請再三撝謙難奪且備養
賢之禮宜遂優閒之秩告免之誠斯爲懇至俯從來奏良
用憮然

罷盧邁平章事詔

任重謀猷道存忠諒辭疾之情旣懇優賢之義斯崇中書
侍郎平章事盧邁朝序公才操履端敏弼諧庶政夙夜惟

寅恭恪之心每思獻納而支體未適固請優閒累表敷陳
懇誠彌切將遂其志予衷耿然爰舉朝章式加命秩可太
子賓客

放免諸道積欠詔

朕臨御兆人爲之父母思底於道俾安其生然則邦計不
可不供封陞且以集事而累經水旱或有流庸積成逋懸
寢以凋瘵每念於此惕然疚懷中宵以興思拯其弊將以
憫其疾苦致於康寧豈可更擾疲人尚爲徵斂宜宏善貸
以惠困窮其諸道州府應欠負貞元八年九年十年兩稅

金史卷一百一十五
及權酒錢總五百六十萬七千餘貫在百姓腹內一切並
免如已徵得在官者宜令所司具條疏聞奏嗚呼天生蒸
人君爲司牧百姓不足過實在予永思其艱載用祇畏宣
示中外令知朕懷

修八陵宮寢詔

八陵宮寢久要修葺此緣日月非便未及興工宜令宗正
寺與所司即計料依所擇日速修理

議修八陵宮寢詔

八陵舊寢宮在山上置來多年曾經野火燒焚摧毀略盡

其宮尋移在瑤臺寺左側今屬通年欲議修理緣供水稍遠百姓非常勞弊今欲於見住行宮處修造冀久遠便人又爲改移舊制恐所見未周宜令中書門下及百寮同商量可否聞奏

出官米平糶詔

訪聞蒸庶之閒米價稍貴念茲貧乏每用憂懷苟利於人所宜通濟今令度支出官米十萬石於街市東西各五萬石每斗賤較時價糶與百姓

罷趙宗儒平章事詔

任人之道必在無私審官之宜所期適用給事中平章事
趙宗儒早以文學累更職任自居樞近頗歷歲時雖夙夜
載勤而政理猶鬱式移秩序以叶朝經可太子右庶子

答羣臣賀修八陵畢詔

朕獲主宗祀以奉園陵歲月滋深是有崇飾今修奉既畢
感慕增懷所賀知

貶韓臯撫州司馬詔

京邑爲四方之則長吏受親人之寄實繫邦本以分朕憂
苟非其才是紊於理正議大夫守京兆尹賜紫金魚袋韓

臯比踐清貴頗聞謹恪委之尹正冀効公忠乃者邦畿之
閒粟麥不稔朕念黎庶方議蠲除自宜悉心以副勤恤臯
奏報失實處理無方致令間井不安囂然上訴及令覆試
皆涉虛詞壅蔽頗深罔惑斯甚宜加懲誡以勗守官可撫
州司馬員外置同正員馳驛發遣

命兵禮部留放人就尚書侍郎對定詔

吏部奏選人依前二月三十日以前團奏畢其流外兵部
禮部舉人等專委郎官恐不詳審共爲取舍適表公平每
至留放之時皆就尚書侍郎對定既上下簡察庶委任得

人

討吳少誠詔

淮西節度使吳少誠非次擢用授以旌旄秩居端揆之榮
任總列城之重期申報効奉我典常而秉心匪彝自底不
類兇狡成性扇誘多端外肆矯誣內懷疑阻毀忠廢信棄
德崇奸擅動甲兵屢越封境壽州茶園輒縱凌奪唐州詔
使潛搆殺傷干黷國章已在無赦朕以王者之德在乎好
生人君之體務於含垢寧屈己以宥罪不殘人以興師是
以上稽宗社之威外抑忠賢之請庶其悛革當議優容今

更幸鄰境之喪逞貪亂之志焚掠縣邑殘暴平人朕猶冀其知非爲之忍恥亟頒詔令未許出師至乃遣軍攻逼許州肆其蠱毒恣行殺戮流害黎蒸惡稔禍盈人神同棄興言致討實悼予衷宜令宣武軍河陽三城鄭滑等州節度東都汝州等軍犄角相應同逼申光蔡州常冀幽州淄青魏博易定澤潞太原淮南等州徐泗山南東道鄂岳等軍各發士馬逐便犄角齊進同爲討伐大軍四合計日殲夷嗟我忠良受茲註誤或心存憤激而力屈兇威玉石俱焚良增憫惻其所收得少誠管內州縣百姓官吏等宜切加

慰撫各示安存淮西將士等夙著勲庸素懷忠義爲其脅制深可哀矜若能因事建功捨逆効順朕當復其職位待以官封其吳少誠在身官爵並宜削奪其有叶心同謀擒斬少誠者先有官未有官者並授御史中丞大夫封異姓王賜實封五百戶賞錢萬貫莊宅各一所子孫永爲功臣先有御史中丞異姓王及刺史者即超轉三資改賜官賞其才器行業爲衆所推者便授節度使如有心懷忠憤謀斬少誠被其屠戮者先無官者追贈三品官賜實封二百戶先有官者贈二品官賜實封三百戶仍各與一子正員

五品官已有官者超三資與正員官其所在百姓能團結士衆討除梟斬少誠者準例封賞人臣之所保者忠天地之所助者順報功宥善朕不食言於戲朕司牧黎元爲之宗極化有所未洽信有所未孚致茲興戎增用媿悼然不暫勞無以逸俗不誅暴無以安人咨爾藩鎮方州列辟連帥所宜戡翦大憝永康兆人其勦力一心以副朕意應諸道準勅赴蔡州許州將士等皆竭忠誠盡心奉國並懷感激叶力勤王若能梟斬少誠者亦準前例官賞策勲之典朕所必行如少誠平後應赴行營將士超三資改官其賞

物節級當續有處分其將士月糧在後迴給家口宣示中外咸令知悉

軍健逋欠牒送本司詔

應是功臣先有明勅或有抵犯令送本司不令府縣官吏擅有笞撻自今已後諸軍功臣官健或因買賣諸色逋欠官錢延時不納宜牒送本軍徵收送納如不䟽理收索即具狀奏聞

停正衙奏事詔

朕方勵精庶政博求嘉言比者百官正衙奏事至有多時

者公卿庶僚屬當寒暑爲弊亦深在於朕懷豈謂優禮自
今勿正衙奏事如陳奏者宜詣延英門請對

恤水災詔

朕獲主兆人以臨方夏憂勤於政思底康寧然而理化未
孚水旱爲沴或傷壞廬舍漂損田疇朕爲人父母用切於
衷其諸道應遭水損州縣令委本道觀察使速具條疏聞
奏當有處分

聽納青苗錢詔

京畿諸縣百姓應今歲青苗錢其中有便於納粟者計約

時估價納之如便於納錢不便於納粟者宜聽委京兆府
專督其務如縣令及主吏壅命者懲罰有差國家經計當
有儲蓄百姓徵賦深可優矜所期使人亦冀均濟咨爾長
吏宜悉朕懷

祔獻祖懿祖於興聖廟詔

國之大事式在於明禋王者孝饗莫重於殷祭所以尊祖
而正昭穆也朕承列聖之休德荷上天之睠命虔奉牲幣
二十五年永惟宗廟之位禘嘗之序夙夜祗慄不敢自專
是用延訪公卿稽參古禮博考羣議至於再三敬以令辰

奉遷獻祖宣皇帝神主懿祖光皇帝神主祔於德明興聖
皇帝廟太祖景皇帝正東向之位宜令所司備禮務極精
嚴祇肅祀典載深感惕咨爾中外宜悉朕懷

遣宰臣告廟詔

奉遷獻祖懿祖神主正太祖景皇帝東向之位虔告之禮
當任重臣宜令檢校司空平章事杜佑攝太尉告太清宮
門下侍郎平章事崔損攝太尉告太廟

亢旱令諸司錄囚詔

京師近郊時雨未洽慮囹圄冤滯致傷和氣是用軫於朕

心其御史臺大理寺及京兆府等諸司繫囚中書門下與有司亟議條理冤滯以聞

免京畿積欠詔

去夏迄秋頗愆時雨京畿諸縣稼穡不登朕用軫慮愧爲父母今宿麥未收其逋租宿貸六十五萬貫石宜蠲除之禮化之本繫乎京師副朕憂人屬於長吏宜勉務農桑各安生業以諭朕懷

流崔河圖崖州詔

崔河圖思過之地不能簡身旣再抵國章當從放逐宜長

流崖州

授孔述睿太子侍讀詔

卿懷伊摯匡時之道有廣成嘉遁之風養素邱園屢辭命秩朕欲峒山問道渭水求師亦何必堅務勞謙固求退讓無違朕命且啟乃心

答孔述睿辭官詔

朕以卿德重朝端行敦風俗不言之教所賴攸深未依來請想宜悉也

起復張重政詔

欽定全唐文

卷五十三

德宗

十

前昭義軍泗州行營衙前兵馬使太中大夫試太子賓客
兼監察御史張重政門有勲力性推義勇夙聞克家之美
常稱撫衆之才近者其父初亡羣小扇惑誘以奇計俾執
軍麾而重政與其母兄號泣固拒遂全懇願奔告元戎不
爲利回成其先志於家爲孝子在國爲忠臣軍政乂安行
義昭著念茲名節感歎良深宜洽恩榮俾宏激勸禮無避
於金革理當由於權奪戎章憲府式示兼崇可起復雲麾
將軍守金吾衛大將軍員外置同正員檢校太子詹事兼
御史中丞仍委淮南節度使與要職事任使

封張重政母魯國太夫人詔

張重政母高平郡夫人徐氏族茂姻閥行表柔明懷正家之美有擇鄰之識頃當變故曾不詭隨保其門宗訓成忠孝雖圖史所載何以加之念其令子已申獎用特彰母儀之德俾崇封國之榮可封魯國太夫人

允權德輿請緣遷祔令子弟營護奏手詔

省所奏請遷祔事具悉卿移孝爲忠嘗竭弼諧之志慎終追遠每增霜露之思無忘在公載陳誠懇眷言倚屬嘉歎良深所請令子弟專往營護允依來奏想宜知悉春暖卿

比平安好遣書指不多及二月十五日

令郊廟從行官吏等自備食物詔

十一月八日有事於南郊太廟行從官吏將士等一切並令自備食物其諸司先無公廚者以本司闕職物充其王府官度支量給廩物其儀仗禮物並仰御史搏節處分

卹葬邢士倫母子詔

子育黎元未能禁暴在予之責用軫於懷宜輟常膳五百千文充葬士倫母子其父既衰耄至無所歸良深矜念委京兆尹厚加存恤

答王真進道德經論兵要義手詔

尚璫至省所陳獻具悉卿職在藩條誠存裨補本乎道德之旨參以理化之源用究元微有茲述作省閱之際嘉歎良深秋涼卿比平安好遣書指不多及

御望春樓誓師詔

嗚呼東鄙之警事非獲已唯爾將校羣士各以忠節勤於王家南赴蜀門西定涇壘甲冑不解瘡痍未平今載用爾分鎮於周鄭之郊敬聽明命夫王者之師有征無戰稽諸理道用正邦國宜勵乃戈甲保固城池以德和人以義制

事將備其侵軼不用越境攻取戢而後動可謂正矣今外
夷來庭方春生植品物資始農桑是時俾爾將士暴露中
野我心痛悼鬱如焚灼嗟爾有衆其悉予懷

遺詔

朕承八聖之休德荷上天之眷祐嗣守丕訓不敢荒寧賴
宗廟之靈羣后之力戡定大難以康兆人嚴恭寅畏二十
有七載今天命降疾不興不寤是用審訓宜聽朕言皇太
子誦元良繼明睿哲齊聖孝友和惠恭敬溫文必能覲祖
宗之耿光紹邦家之大業宜於柩前即皇帝位嗚呼朕常

奉聖祖元元清淨之教勵精至德保合太和每忘己以愛人豈嘉生而惡死咨爾將相卿士方伯連帥其敬保元子永綏萬邦各有叶心同底於道無廢我高祖太宗之休命諸道節度使觀察防禦等使及諸州刺史等膺鎮守之任有軍旅之事所寄尤重不可暫曠不須赴哀以日易月之制宜遵舊典文武官等朝晡哭臨十五舉音朕每覽漢史至孝文薄葬之詔未嘗不歎息嘉尚緬慕其風園陵制度務從儉約百辟卿士孝子忠臣送往事居無違朕意

欽定全唐文卷五十四目錄

德宗 五

罷邕府金坑勅

勘造簿籍勅

改元建中勅

賜劉晏自盡勅

行常平法勅

授朱巨川中書舍人勅

褒贈淮寧軍忠義將吏勅

宣慰兩河百姓勅

宣慰平盧軍陷淮西將士勅

郃國大長公主別館安置勅

復先減官員勅

定五月朔日御宣政殿朝儀勅

委本道節度使監軍同勾當常平倉勅

水災賑恤勅

禁欠陌錢勅

令禮官議祔廟勅

令二年一造文簿勅

贈權倖尚書禮部郎中勅

許永州司戶蘇袞歸里勅

權停貢舉勅

答百寮請復尊號批

答韋臯謝頒示政刑箴表批

答韋臯謝賜紀功碑表批

答中書門下進奉和春麟德殿會百寮觀新樂詩

狀批

答權德輿謝追贈祖倕禮部郎中表批

放免諸道先停放將士資糧德音

上睿文孝武皇帝冊文

遙尊皇太后沈氏冊文

冊李晟司徒文

冊李晟太尉文

冊馬燧司徒文

命皇太子即位冊文

欽定全唐文卷五十四

德宗 五

罷邕府金坑勅

朕聞致理之君克勤於德不貴遠物所寶惟賢故堯設茅茨禹卑宮室光武捨去寶劍順帝封還大珠朕以眇身獲守丕業仰止前王之德思齊太素之風未嘗緣情於服翫措意於珠玉庶乎捐金抵璧返樸還淳邕州所奉金坑誠爲潤國語人以利非朕素懷方以不貪爲寶惟德其物豈尚茲難得之貨生其可欲之心耶其金坑宜委康澤差擇

清強官專勾當任貧下百姓採劬不得令酋豪及官吏影
占侵擾聞奏當重科貶俾夫俗臻富壽人識廉隅副朕意
也

勘造簿籍勅

内外文武官職田及公解田準式州縣每年六月三十日
勘造白簿申省與諸司文解勘會至十月三十日徵收給
付本官近來不守常規多不申報給付之際先付清望要
官其閒慢卑官即被延引不付自今後準式各令送付本
官又準式職田黃籍每三年一造自天寶九載以後更不

造籍宜各委州縣每年差專知官巡覆仍造簿依限申交所司不得隱漏及妄破蒿荒如有違犯專知官及本典準法科罪

改元建中勅

春秋有五色之統蓋王者踰年建號體元居正上以繼業反始下以書事布策示不忍有變於中年也朕以不造銜恤在疚而三事大夫迫至公之命喻大孝之道實奪予哀爲衆所戴恐墜祖宗之遺烈不若先帝之前訓如履薄將陷如乘奔失御濡露之感忽焉歲初罔極之懷瞻天靡及

舊物未改常典惟新勉而從之良增感奉其以大歷十五年改爲建中元年所司準式庶協履端於始載符皇極之義也

賜劉晏自盡勅

亂常干紀罪莫大焉除惡去邪刑其無捨忠州刺史劉晏性本姦回志惟凶慝頃司邦賦厯踐朝倫剝削爲功毒痛黎庶按問贓賄不知紀極朕將崇政本必去愷人猶是含垢務全大體俾從降黜尚列藩侯黷亂之辜掩而不問旋乃結聚亡命擅興師徒固有悛心力行非度播於人聽惡

跡彰聞爰命連率究實其罪而蒐兵補卒遍於鄉閭執銳披堅出於郊境拒捍朝旨威脅使臣人之無良一至於此孽由自作法所不容正其典刑以懲姦蠹宜賜自盡仍令庚準差官勾當處置聞奏

行常平法勅

夫常平者常使穀價如一大豐不爲之減大儉不爲之加雖遇災荒人無菜色自今已後忽米價貴時宜量出官米十萬石麥十萬石每日量付兩市行人下價糴貨

授朱巨川中書舍人勅

典掌王言潤色鴻業必資純懿之行以彰課最之績久更
其職用得其才朝議郎行尚書司勳員外郎知制誥朱巨
川學綜墳史文含風雅貞廉可以勵俗通敏可以成務自
司綸翰屢變星霜酌而不竭時謂無對今六官是總百度
惟貞才識兼求爾其稱職膺一獎拔是用正名光我禁垣
實在斯舉可守中書舍人散官如故

褒贈淮寧軍忠義將吏勅

王者體至公而立極申明賞以垂法旌德表善發揮忠貞
其有推丹誠以奉君臨大節而不奪守志明節殺身定難

則褒勸之典所宜優異李希烈背天逆物通結羣盜奸謀
藏於汴宋罪迹彰於汝鄭傾陷城邑虐毒蒸黎忠義之徒
因懷感激故淮寧軍節度都虞候正議大夫試大理卿兼
許州別駕占闕兼御史大夫上柱國政和郡王食實封一
百戶周曾忿奸邪之亂紀處危逼而思正陰建明義叶誅
元兇遂與故許州都督鎮遏兵馬使同淮寧軍節度副使
開府儀同三司賜太常卿兼御史中丞上柱國定州郡王
食實封五十戶王玠故淮寧軍節度左廂兵馬使兼十將
開府儀同三司賜太常卿兼潞州長史占闕兼御史中丞

上柱國常林郡王食實封五十戶呂從賁故十將輔國大將軍行右金吾大將軍員外置同正員兼賜太常卿上柱國合浦郡王食實封五十戶康秀琳故節度監押衙宣德郎監察御史裏行賜緋魚袋姚憺故十將銀青光祿大夫賜太子賓客上柱國梁興朝故十將開府儀同三司太常卿河東縣開國伯賈樂卿故輔國大將軍員外置同正員兼賜太常卿侯仙欽等誓心定志潛結忠謀將臨汝海之郊師於襄城之野方議梟其同惡獻首鎬京率彼戎旗南屯蔡邑傳一檄以定許冀尅日而方就許冀有應殲弭可

期事方垂成爲魁渠之所糾察緬懷義烈悉嬰屠戮無辜
殞命萬夫增憤形質委於原野忠魂越於草莽恍惚幽壤
茫茫無依朕所以負扆長嘆坐朝興悼念忠良之不造空
名在而身歿休德壯志貫於神明而爲元惡矯誣翻欲歸
過豈可使義烈之績泯而不彰宜加褒贈以示中外曾可
太尉賜食封二百戶通前三百戶玠可司徒賜食封二百
戶通前二百五十戶從貴可尚書左僕射賜食封一百戶
通前一百五十戶秀琳可贈尚書右僕射賜食封一百戶
通前一百五十戶憺可贈兵部尚書賜食封二百戶興朝

可贈戶部尚書賜食封一百戶樂卿可贈刑部尚書賜食
封二百戶仙欽可贈工部尚書賜食封一百戶仍令右散
騎常侍蕭昕往汝州界首以禮致祭并委李勉哥舒曜與
州計會訪其家口父子兄弟具其名聞即當類敘別有優
獎有子者仍許其同父官爵其子孫三代以來有過犯者
得以遞減一等罪論用彰峻節淮寧軍節度押衙中散大
夫試殿中監兼唐州別駕占闕上柱國韋清與周曾姚憺
始末同志曾等遇害清以智免率其麾下閒道歸誠大節
可嘉公賞宜茂可銀青光祿大夫守太子賓客兼御史大

夫定安郡王食邑三千戶仍賜實封二百戶勲如故朕撫
臨億兆於今五年每盱食宵衣勤求政理推誠委下日冀
休兵明末燭幽德慚柔遠戎車尚戒大信猶鬱使忠烈之
士殞身賊庭靜言興懷一食三歎罪己之責實謂在予其
周曾等所賜實封可載於典策傳其子孫永固山河之誓
代代無絕自建中以來如有爲國竭誠密圖元惡事或未
就翻被誅夷或名氏未彰或休聲未振者旣死節於王事
宜書勲於竹帛並委諸道招討節度所在博訪明加曉示
得其事迹具以奏聞特以褒獎朕方建明義於蠻貊宣大

信於四海申必罰以懲其姦慝施厚賞以報其勲庸宣布
天下令知朕意

宣慰兩河百姓勅

朕嗣守大業於今五年承祖宗之成烈受明靈之耿命何
嘗不損己求瘼視人如傷思省徭賦以康邦俗納羣生於
壽域躋大化於昇平而德固虛薄志不昭感叛人未附戎
馬方殷在予之責鑒寐多懼自兩河背叛兇逆相因殺害
無辜竊盜城邑搖蕩我邊鄙荐食我黎元勞我師徒費我
征賦累更時歲未克底寧朕子育萬人務康暴亂棄其細

故待以初誠申之以大信示之以好惡將冀迷乃知復困
則能通亦欲先德後刑有征無戰不勞師旅以致和平而
包藏禍心自相搆讐侮慢朝旨偷恤甲兵去順効逆曾無
悛志謂天可罔謂責可逃緩之則爲患益深逼之則矯闕
窮究挾藏詐匿詭毒萬端陷此忠良申雪無路朕爲人父
母實所痛心豈可忍此姦回爲之覆燾是以大整師旅肅
爾天誅載清寓縣以息黎庶事不得已而至於斯頃以軍
興飛輓相次軍供之費餽運之勤屢擾農商或擅其利州
縣征賦重及疲人朕心在止戈日冀蠲復先志未就後慮

繼之徵責既加名目猶廣百姓私養無以自贍惟是夙夜
不遑晏寧豈不知耕織之艱難轉輸之勞苦每一念至載
深憂肝儻上元垂祐烈祖降靈憑將帥之謀股肱之力俾
我一戎永清四海則頒賦名目悉停兩稅定數亦各減放
以便萬姓咸與昭蘇各委節度觀察刺史縣令所在郡邑
明加曉諭使知予意朕鬱於大道遠邇未臻必假人力以
清多難宣布中外咸使聞知

宣慰平盧軍陷淮西將士勅

勅淮寧軍將士等頃自平盧來赴國難涉溟海不測之險

滅兇賊作亂之徒其後分鎮淮西防秋隴上奉我王事久
著勲勞或者老見存子弟相繼舉其誠効並是勲臣頃被
李希烈脅從無路申雪永言勲舊實可憫傷邇者已勅諸
軍不加征伐冀能相率歸保功名副我念舊之心成其自
新之節其陷在淮西將士應有親族在節度觀察使及刺
史縣令等切使安存使皆得所如有莊宅店鋪奴婢六畜
產業等各任如舊不得輒有侵擾如全家歿在淮西更無
親族爲主者即官爲檢校待當主復即時檢付仍分明布
告咸使知之

部國大長公主別館安置勅

妖妄莫甚於巫蠱罪惡莫逾於姦亂迹涉於此刑其捨諸
部國大長公主澡質天潢不慎其德行違禮法志匿回邪
信妖孽之虛言求厭勝之非福憫其將老之年從我議親
之典置於別館勿謂無恩其子蕭位不思諫正手疏祝詞
其弟蕭佩儒偲及異父兄駙馬都尉裴掖相與知情陷於
不義蜀州別駕蕭鼎商州豐陽令韋恪前彭州司馬李萬
等謬居清貫輕紊常倫在其門庭多行穢德忝列衣冠之
緒豈宜履舄之交宜令京兆府決重杖四十配流賀州裴

掖綿州安置蕭佩儒偲等並配房州安置其蕭位等並馳驛發遣

復先減官員勅

王者建設庶官允釐九有量戶口之衆寡定都邑之等差制其職員約以名數俾吏足成務而下克奉公其有弛張必在通濟朕頃緣蕃戎棄信深犯封疆興師備邊資用日費而黎人困弊難更徵求遂權減天下州縣官員姑務集事皆由朕不明不德以至於斯近聞新受官人皆已隨牒之任扶老攜幼盡室而行俸祿未請歸還無所噉噉道路

實疲於懷雖蒸庶之閒供應有省而衣冠之族流寓無依苟便於時豈憚沿革凡百君子所當悉知其先減官員並宜仍舊

定五月朔日御宣政殿朝儀勅

仲夏之時萬物敷暢陽德方茂陰事始承昔者聖賢仰觀法象因天地交會之序爲父子相見之儀沿習成風古今不易王者制事在於因人酌其情而用中順其俗以爲禮咸覲之義旣行於父子之閒資事之情豈隔於君臣之際申恩卿士自我爲初自今以後每年五月一日御宣政殿

與文武百寮相見京官九品以上外官因朝參在京者並聽就列宜令所司即量定儀注頒示仍編禮式以著恒規

委本道節度使監軍同勾當常平倉勅

諸軍鎮和糴貯備共三十三萬石本價之外更量與優饒其粟及麻據米數準折虛價直委度支以停減江淮運腳錢充並支綾絹絕綿勿令折估其所糴粟等委本道節度使監軍同勾當別貯非承特勅不得給用

水災賑恤勅

惠下卹人先王之政典視年制用有國之恒規故有出公

粟以賑困窮弛歲征以寬物力救患之道何莫由茲頃以諸道水災遣使宣慰中心是屬夕惕彌勤省覽條奏載懷惻惻用加救恤以濟吾人應諸道遭水漂蕩家產淹損田苗乏絕戶宜共賜米三十萬石所司各據州府乏絕戶多少速分配每道合給米數聞奏並以度支見貯米充度支即與本道節度觀察使計會各隨便近支付委本使差清幹官請受分送合賑給州縣仍令縣令及本曹官同付人戶務從簡便無至重擾速分給訖具狀聞奏其州府水損田苗及五六分者今年稅米及諸色官田種子並減放一

半損七分以上一切全放其所減放米如是支用數內應令度支及本道以諸色錢物充填並委度支條件聞奏其兩稅錢所司準舊例處分朕撫臨兆庶思致和平理化未臻良增寅畏方鎮守宰職在親人所宜分憂以救艱食必躬必信副朕意焉

禁欠陌錢勅

陌內欠錢法當禁斷慮因捉搦或亦生姦使人易從切於不擾自今已後有因交關用欠陌錢者宜但令本行頭及居停主人牙人等檢察送官如有容隱兼許賣物領錢人

糾告其行頭主人牙人重加科罪府縣所由祇承人等並
不須干擾若非因買賣自將錢於街衢行者一切勿問

令禮官議祔廟勅

于頔等議狀論禘祫事所請各殊理在討論用求精當宜
令尚書省會百寮與國子監儒官切磋舊狀定其可否仍
委所司具事件奏聞

令二年一造文簿勅

每年造簿事乃近煩三年一申又爲太簡如外官並須勘
造一切慮因此擾人宜今應管京官職田等州府所造文

簿二年一送餘依

贈權倖尚書禮部郎中勅

代必生賢爰追祖德恩當被遠用示朝章山南西道節度
管内支度營田觀察處置等使銀青光祿大夫檢校吏部
尚書兼興元尹御史大夫上柱國扶風郡開國公食邑二
千戶權德輿亡祖故右羽林軍錄事參軍倖含和體仁克
己存道五常佩訓三命滋恭服先儒之大倫知穀也之有
後謀孫是慶祚以公台歸葬惟時光乎邱壠佳城再啟縟
禮宜申飭彼泉扃寵茲郎位式獎列藩之重且彰漏澤之

榮可贈尚書禮部郎中

許永州司戶蘇袞歸里勅

左降官蘇袞貶官本緣并連坐矜其年暮加以疾患宜令所在勒回任歸私第

權停貢舉勅

禮部舉人自春以來久愆時雨念其旅食京邑資用屢空其禮部舉人今年宜權停

答百寮請復尊號批

三省來章彌用兢惕再崇大號何以當之前者示懷蓋非

沖讓尚勞敦請豈所宜然卿等博學古今列於朝右思宏
獻替共致太和豈以虛名重予不德再三循省增慙於懷
想爾深衷勿更陳請

答韋臯謝頒示政刑箴表批

朕以爲理之本繫乎政刑頃因退朝偶有製述用錫人極
庶叶時中聊以自規豈能逮意卿道贊元化志宣大猷爰
勒貞珉躬自染翰克盡事君之節益嘉將順之心省閱再
三歎賞無已

答韋臯謝賜紀功碑表批

卿元臣上宰道贊緝熙貞諒

闕

彝忠

闕

之才寅亮中樞懷

柔遠俗

闕

寧息

闕

列於金石禮亦宜之卿將頤

闕

心遠

闕

所謝知

答中書門下進奉和春麟德殿會百寮觀新樂詩

狀批

朕思以中和被於風俗旣傳令節載序樂章因會羣寮用
申歡宴斐然成韻有媿非工卿等各抒清詞咸推藻麗再
三省覽良用嘉焉所獻知

答權德輿謝追贈祖僊禮部郎中表批

省所奏請迴檢校官及兼追贈亡祖事宜具悉卿位更將相委重藩方褒贈自是典章豈必更迴官秩因心志切報本誠深已詔追榮良增嘉歎想宜知悉夏熱卿比平安好遣書指不多及

放免諸道先停放將士資糧德音

勅興理化者務積於人長國家者以義爲利故斂之欲薄而使之以時然後億兆歡心遠邇欣戴政平俗阜必本於茲朕服承天命撫臨區夏憂矜在慮宵旰忘勞苟可以助化寧人便時益下事無大小皆盡其心比以中夏甫寧頗

勤經費遂收諸道停減將士糧斛用叶權宜言念疲甿重
茲供億頃雖䟽理轉送猶勞睠彼東南良深矜歎夫崇儉
可以足用節事可以豐財所當約己菲躬量宜濟務豈資
厚取方給軍須思息遺黎俾蠲徭賦其貞元二年三年以
前所收諸道停減放歸營農將士軍資糧斛錢米等緣送
納向畢任依前勅收管其貞元四年已徵到及在路者即
依前送其在百姓腹內者並宜令放免其貞元五年已畢
每年合收一百七萬八百八十八貫石宜並放免仍委每
道觀察使具當管每州都放錢數聞奏並各下本州曉示

百姓令知其悉於戲人惟邦本本固邦寧百姓苟豐君孰不足式敷簡惠俾革煩擾庶其安逸各務農桑布告遐邇明知朕意

上睿文孝武皇帝冊文

維某年月日哀子嗣皇帝臣某伏以聖德之大上與天合人道近暱鮮克究知敢盡其所見泣以敘財成之業伏惟大行皇帝紹休七聖臨照八極以至道御羣有以至化懷遠方登假於上敷聞在下肇加元服頃昇儲闈生知之敏動與神契承順元宗也齊栗之容著奉養肅宗也愛敬之

禮深履蒸蒸躬翼翼不絕馳道日朝寢門此則首冠百王
大舜周文之孝也其於崇儒尚齒尊道貴德窮理盡性之
學經天緯地之文包荒含垢之量迪哲允恭之善斯又睿
聖不測同合乎三五無得而稱也當祿山叛亂陷覆二京
以天人之重授元戎之律師之所及狂寇殲夷復宗社之
阽危拯生靈於焚燎則乾維重構宸極以安及史盜閒覺
三河屢梗在撫軍之際思明隕命乘踐祚之初朝義授首
則梁陳底定朔易從風其或屈強於大梁背誕於南越莫
不朝爲梟獍夕爲鯨鯢此高光之功神武之略也自是肅

勿羣后賓延萬靈滂瀝鬱沒之刑寢焚瘞懸沈之禮備衣冠有淪於脅從者釋而靡問靈祇有闕於禋祀者秩而致享聖讒說求讜言扇以祥風浸以膏澤九譯奉貢四夷來賓丕冒日出罔不率俾猶復嚴恭寅畏顧省闕遺兢兢業業日昃不暇故得元功廣運協氣旁流靈契畢發元符洊至則瑞璧出於泗清瀾變於河其餘見祉鱗羽呈祥草木者不可殫記方議橐弓偃伯臻於太和告禪於石閭鏤功於金版遽承憑几之命奄遘綴衣之酷號天叩地罔所依歸今龍攢就啟蜚輅將駕採鴻儒碩生之議考公卿百辟

之請僉以盛德大業匪號諡莫宣是用虔奉古訓發揚茂
實謹遣攝太尉某奉冊上尊諡曰睿文孝武皇帝廟曰代
宗伏惟明靈降格膺茲典禮誕錫純嘏貽宴後昆嗚呼哀
哉

遙尊皇太后沈氏冊文

嗣皇帝臣某言恩莫重於顧復禮莫貴於徽號上以展愛
敬之道下以正春秋之義則祖宗之所稟命臣子之所盡
心尊尊親親此焉而在兩漢而下帝王嗣位崇奉尊稱厥
有舊章永惟丕烈敢墜前典臣某謹上尊號曰皇太后

冊李晟司徒文

維年月日甲子皇帝若曰粵惟上天眷佑我唐賚予元輔
戡夷逆亂宣振忠貞光昭永圖奮揚丕烈今敬從典禮彰
信於朝咨爾開府儀同三司檢校尚書左僕射同中書門
下平章事合川郡王李晟希代特生乘時閒出高明稟忠
厚之楨闕故得擁是旄幢徇於封略旋師中冀討孽上京
一鼓而兇魁電竄皇居乃正清廟重安大效展於邦家大
惠孚於黎庶武昭七德文洽九歌俾予一人潛復丕業抑
聞功懋懋賞義在疇庸德懋懋官理在翊善爾旣憂勤勩

力端明一心申之以武功重之以文德是用稽之舊制冊
命爾爲司徒宜亮采台庭光融相府敘彝倫於九牧凝庶
績於百工祇率典章阜成邦教膺茲景命可不慎歟

冊李晟太尉文

維貞元三年歲次丁卯四月乙卯朔二十四日戊寅皇帝
若曰在天成象三辰耀其景在地成形五嶽峻其位古先
哲后罔不憲章故則天之明因地之利建官置輔論道經
邦配六符於泰階運七政於皇極無其才則禮闕有其德
則榮升爰自唐虞率由斯道故久虛上台之坐以俟其人

載懷勲賢聿歸元老咨爾奉天定難功臣司徒中書令上
柱國西平郡王食實封一千五百戶李晟天授明德爲時
棟梁膺期挺生佐理戡難作我英宰保大定功渾忠義以
居心等夷險以爲體魏郊伐叛申肅殺之威漢苑摧兇樹
廓清之效宮城遂復廟社攸安三輔釋塗炭之憂萬國允
朝宗之願及夫藩鎮岐下黎獻昭蘇蹕威稜於接境阜農
耕於夷壤欽若朝政櫜戢干戈弼予一人永清四裔聿懷
丕茂之績式崇寬大之請是用命爾爲太尉惟其敬之哉
且德盛故禮殊功高故賞茂崇極九命華貫三台持華歆

養德之規保荀顗清純之道具瞻斯在可不慎歟

冊馬燧司徒文

維年月日甲子皇帝若曰昔有虞之帝天下也契作司徒
誕敷邦教五常以遜百姓斯親其在鄭友翊亮於周鄧禹
宣猷於漢亦皆以德當國以勲持令天贊我唐允生忠輔
出則擁旄定亂重其望以成功入則調鼎登庸資其實而
論道再新茲典榮命攸宜咨爾檢校司徒兼侍中北平郡
王馬燧岐山粹靈楨我王國明謀炳於著蔡雄略極乎韜
鈴文武在躬剛柔備體欽崇一德期協阿衡故能受脤專

征作我心膂揚旌仗鉞外鎮雄都正師律以寧邊宣國風
而撫俗華夷式敘朔塞無虞崇其大勲謙德彌著懿茲茂
範實簡子衷昔貞觀初戡定羣雄拯寧庶類有若趙國公
無忌外運夷兇之効內申翼善之謨陟居中台鬱爲時棟
今予亦命爾光贊大猷是用冊爾爲正司徒宜祗厥位九
功丕緒咨爾緝熙五品不昭咨爾寅亮予違汝弼無或面
從式宣勵翼之誠允副寵光之命具瞻斯在可不慎歟

命皇太子即位冊文

維貞元二十一年歲次乙酉正月辛未朔二十三日癸巳

皇帝若曰於戲天下之大實惟重器祖宗之業允屬元良
咨爾皇太子誦睿哲溫恭寬仁慈惠文武之道稟自生知
孝友之誠發於天性自膺上嗣毓德春闈恪慎於厥躬祇
勤於大訓必能誕敷至化安勸庶邦朕寢疾彌留弗興弗
寤是用命爾繼統俾紹前烈宜陟元后永綏兆人其令中
書侍郎同中書門下平章事高郢奉冊即皇帝位爾惟奉
若天道以康四海懋建皇極以熙庶工無忝我高祖太宗
之休命